

տաղի հեղեղատի պես, ոչնչացնում է բոլոր հանդիպածը, բայց երբ կրկին ցամաքում է գետինը եւ հողը ետ է ստանում իր ուժը, այն ժամանակ կրկին բուսեցնում է բոլոր սերմերը, որ դրած էին նրա արգանդի մեջ:

Մեկը խորամանկ հարստահարող է, միւսը մեծասիրտ աւազակ: Իսկ երկու դեպքումն էլ տանջւում է, սպառնում է անբախտ գիւղացու կեանքը...

Կարօն բացատրում էր ինձ այս բոլորը, ասում էր՝ թէ գիւղացու վիճակը կարող է աւելի բարւոք լինել, եթէ հասարակութիւնը ուրիշ ձեւով կազմակերպած կը լինի: Նա ասում էր, թէ այն ժամանակ չարութիւն չի լինի, բոլոր մարդիկը բարի կը լինեն, ամենի ապրուստը ապահովուած կը լինի. — աղաների դարը կանցնէ, կտիրէ միայն արդարութիւնը եւ իրաւունքը: Նա երկար ու երկար մեկնում էր, թէ ինչ ձեւով պետք է հասարակութիւնը կազմակերպել, որ զօրեղն անզօրին չճնշէ, որ մշակ մարդու աշխատութեան վաստակը չխլեն եւ նա միշտ իր տանը ուտելու հաց ունենայ, եւ ամենի վրայ տիրէ հաւասարութիւնը...

Կարօն ուրիշ շատ բաներ ասում էր ինձ, բայց ես յիմար էի, շատ յիմար, նրա խօսքերը իմ գլխումը չէին մտնում, ես ոչինչ չէի հասկանում եւ սկսում էի նրա մտքերի դէմ հակառակել: Ես միայն ասում էի այս բոլորը աստուծոյ կամքովն է լինում. մարդը չէ կարող իր տիրոջ կամքին հակառակել. եթէ աստուած ուզենայ, ինքը ժողովրդին հանգստութիւն կուղարկէ, ինքը կուղղէ նրա ճանապարհը: Երեւի աստուած չէ կամենում, որ ժողովուրդը իր անբախտ դրութիւնից դուրս գայ, որովհետեւ այս նրա պատիժն է:

Կարօն շատ էր տխրում, երբ ես այսպիսի մտքեր էի յայտնում: Բայց ես յետոյ հասկացայ, որ նա իր դատողութիւնների մեջ ուղիղ էր: Հասկացայ, բայց խիստ ուշ...

### ԻԷ. ՀԱՅՐԵՆԻՔԻ ՍԵՐԸ

Բայց ի՞նչ էր, որ կապում էր հայերին մի այնպիսի երկրի հետ, ուր նրա կեանքը հանապազօրեայ վտանգի մեջ էր, ուր նրա կայքը ապահովուած չէր, ուր նրա ապրուստը խառն էր արեան ու քրտինքի մեջ, ուր նրա ընտանեկան սրբութիւնը արատաւորում էր, ուր նրա կրօնքը եւ ամէն ինչ, որ նորական էր նրա համար, սրբապղծում էր: Ի՞նչ էր, որ կապում էր հայերին այսպիսի երկրի հետ. — Հայրենիքի սերը:

Հայրենիքը լի էր անթիւ յիշատակարաններով, որոնք ասում էին հային՝ «դայ քո երկիրն է, այստեղ էին ապրում քո նախնիքը, եւ այստեղ մեռան